

■ CUSSEGL DAL PUBLIC SRG.R

Nossaistorgia.ch – ina pagina nua ch'ins po restar pendì

(rtr) En l'ultima seduta dal 2018 è il Cussegl dal public da la SRG.R s'occupà cun la pagina «nossaistorgia.ch», ils «Accents», la revista da chasa dad RTR, e l'emissiun naziunala «Gli altri, ils auters, les autres, die Anderen». La plattafurma Nossaistorgia.ch, ch'è vegnida lantschada l'october 2017 dad RTR en collavuraziun cun la fundaziun «Fonsart», è l'emprima plattafurma digitala, istorica e participativa da la Svizra rumantscha e dal Grischun. Sin «nossaistorgia.ch» pon privats ed instituziuns metter online lur fotografias, videos u documents e parter quels cun la communitad. Il cussegl dal public (Cdp) è intgantà da quest'idea. I dovria in zic temp per vegnir a frida cun la navigaziun, ma ina giada ch'ins haja chapì il sistem saja quai fitg interessant da sfegliar en regurdientschas e reminiscenzas. La funcziun da tschertga giadia fitg bain da chattar quai ch'ins tschertgia. Ultra da quai dettia quai era divers filters che simplifitgeschian la lavur. Il Cdp fa in grond compliment per l'idea e la realisaziun. Quai saja in project che duess en mintga cas cuntinuar.

Buns resuns per la revista «Accents»

Bun format, bun layout e buns cuntegns. Quai è il facit ch'il Cdp fa suenter avair prendì sut la marella las ultimas ediziuns da la revista che cumpara quatter giadas l'onn. La publicaziun ch'exista dapi il 2010 vegn tramessa a tut las collavuraturas e tut ils collavurats dad RTR, a tut las commembras ed ils commembers da la SRG.R ed ad ulteriurs abunents ed abunentas che s'interessan per quai che capita tar RTR e la SRG.R. Al Cdp han en spezial las infurmaziuns en connex



Cussegl dal public: (emprima ritscha da sanester) Lucrezia Berther, Claudia Nicolay, Curdin Tuor, Gion Capeder, Gianna Sonder, Ursina Schmed; (segunda ritscha da sanester) Selina Crivelli-Caduff, Giancarlo Conrad, Carmen Dedual, Roger Tuor (president); (terza ritscha da sanester) Tina Vulpi, Pascal Caminada, Adrian Viletta, Ursin Defuns, Alexi Nay.

MAD

cun las collavuraturas ed ils collavurats dad RTR plaschi ordvart bain. Quai dettia ina colliaziun famigliara tar RTR. Ins emprendia d'enconuscher ils novs en il team dad RTR e vegnia er infurmà sch'insatgi bandunia l'interpresa. La gasetta infurmeschia dentant er dad innovaziuns tar RTR, novas emissiuns, novas ideas e projects e dettia era la pussaivladad da guardar davos las culissas da l'interpresa.

Mintgant po il Cdp er crititgar ils auters

«Gli altri, ils auters, les autres, die Anderen» – uschia sa numna l'emissiun che vegn emessa da la RSI, dad RTR, dad RTS e dad SRF. Ils cussegls dal public da las uniuns purtadras da la SRG SSR han per ina giada guardà sur cunfin ed analisà las emissiuns che van sin auters emetturs.

Il Cdp da la SRG.R è vegnì a la conclusiun che tar RSI ed RTR saja quest'emissiun piazzada bain ed i dettia bunas infurmaziuns supplementaras sin lur paginas d'internet. Tar RTS ed SRF dettia quai anc potenzial da megliar. Là na dettia quai strusch avis sin l'emissiun, per exempel en furma da trailers u sin la pagina d'internet. Quai saja donn, pertge l'emissiun sezza saja divertenta ed attractiva. I

dettia buns temas ord las regiuns che fettschian gust sin dapli. L'auditur possia adina puspè far l'experientscha: «Aha, quai datti en la Svizra taliana/rumantscha/franzosa/tudestga.» Per vender anc meglier l'emissiun propona il Cdp da la SRG.R ina realisaziun audiovisuala, q.v.d. d'integrar videos curts (en il stil da Nouvo) e fotografias sin la pagina d'internet per uschia cuntanscher in public anc pli vast.

Adia ad Oscar Knapp

Il Cdp n'ha betg laschà passar l'ocasiun d'engraziar ad *Oscar Knapp*, il president partent da la SRG.R, per sia gronda lavur. Knapp n'ha quasi manchentà nagina seduta dal Cdp, ha prendì fitg serius la lavur da quest gremi e stimà ella. Ses messadis ch'el ha adina puspè deponì en la seduta eran bain preparads ed il Cdp era uschia adina infurmà da quai che curra e passa en la SRG. Il president dal Cdp, *Roger Tuor*, ha surdà in pitschen regal a Knapp e gjavischà ad el muments main turbulents ch'els ultims onns cun la SRG.R.

Infurmaziuns davart il Cussegl dal public SRG.R

Il cussegl dal public è in gremi consultativ independent ch'accumpogna la lavur ed il svilup dal program dad RTR Radiotelevision Svizra Rumantscha cun constataziuns e propostas. Il cussegl dal public sa raduna per regla quatter giadas ad onn. El observa singulas purschidas da program, emissiuns ed offertas online dad RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.